

*niseo lib. 2. de jure Majest. cap. 3. sect. 10. scintilla divina mentis post lapsum in mentibus hominum relicta, qua inter honesta & turpia distinguimus.*) E. sequitur, quod omnes homines debeant observare illud jus; Si omnes homines, E. & Principes.

XXXI. Idem nobis de Jure Gentium esto judicium, cui Princeps seu superiori parere debet.

XXXIII. Inde sequitur, Principem jure pacta non rumpere. Probamus id 1.) quia in Contractibus jure privatorum utitur, & (asserente *Petr. Greg. Tholos. Lib. 7. c. 20. f. 47.*) habetur pro privato, siquidem se submittit juris Communi dispositioni, sequendo formam à jure Civili vel Gentium præscriptam. Jam v. Privatos pactis conventis, ex dictamine ipsius Juris Naturæ, stare oportet. E. Princeps pacta servare debet. 2.) Quia in pactis est mutua obligatio, à quâ discedi sine mutuo consensu non potest, *vid. Bodin. l. c.* sequitur, quod Princeps pactum non possit rescindere, nisi mutuo consensu, & ab altera quoque parte sublata obligatione. Et hac obligatione nec plenitudo potestatis, nec ulla urgens clausula eum eximit, fatentibus Politicis & Jctis, quos adducit *Reinking. Lib. 1. cl. 3. c. 12. n. 16.* 3.) Probamus à simili. DEUS ultrò suis pactis se submittit, *Jerem: 45.* & exemplum vult Principibus esse, quod semper oculis perlustrare, & in regulam vitæ usurpare debent.

XXXIV. Aliter se res habet cum legibus merè Civilibus & positivis. Nam ab his soluta est Majestas; tanquam superior. Hinc potest illas dispensare & reformare, imò planè tollere.

2.) *Divisio.* XXXV. Tametsi verò Majestas variis modis dividitur, v. gr. in plenam, & minus plenam; & utraq; vel ut totum quasi integrale in partes quasi integrantes, vel rectius ut totum potestativum, in diversas potestates aut facultates, quæ sunt Regalia, subdividitur, &c. Ego tamen, missis his distinctionibus omnibus, agam speciatim de sola Reali & Personali; cum nulla alia divisio magis obnoxia sit abusui, adeoque ab eò omninò liberari petat. Rectè enim *Bæclerus Instit. Pol. L. 2. cap. 1. p. 94.* *Quam distinctionem, qui satis explicaverit, vix unus; qui malè usurpaverint & adhibuerint, plurimi reperiuntur. Tollatur itaque abusus, & maneat usus!*

CAPUT